

PORTUGALLIA REGNUM.

PORTUGALLIAM impropiè Lusitaniam appellant, cum alioqui nec tota Portugallia Lusitaniæ finibus circumscripta sit, nec totam Lusitaniam complectitur: illud tamen negari non potest, potiorem Lusitaniæ partem Portugalliæ Regi parère. Diuiditur verò Portugallia in Transtaganam, Cistaganam, & Interamnem. Transtagana Bæticæ partem carpit, eam scilicet, quæ ab Ana fluuio ad Regni limites porrigitur. Interamnem appello Portugalliam, quæ est inter Durium & Minium fluuios, Regio non minus amœna quàm fertilis. Hæc Interamnis tota extra Lusitaniam est, nisi repudiata descriptione posita, Straboni magis accedamus, qui ait, maximam Lusitanorum partem Callaicos appellatos. Huius Regionis longitudo est duodecim leucæ; latitudo qua maxima est, duodecim; alibi tantum sex, aut etiam quatuor. Atque in hoc tam exiguo terræ interuallo, præter Ecclesiam Bracensem Metropolitanam, & Portugallensem Cathedralem, ac alias quinque Collegiatis, reperias plusquam centum triginta Monasteria, quorum pleraque redditus habent amplissimos: præterea plus minus mille quadringentas sexaginta Parochiales, cum suis Baptisteriis, vt scribit quidam. Certè in ea parte, quæ Bracensem agnoscit Ecclesiam, octingentæ recensentur. Ex qua re fertilitatem & Religionem antiquam gentis facillè agnoscas. De amœnitate verò quid opus est dicere, cum in ea numerata sint vltra viginti quinque millia fontium perennium: Pontes quadrato lapide elegantissimè constructi, prope ducenti: portus marini sex. Quod propterea minimè tacendum duxi, quia bonitas & dignitas huius Prouinciæ ferè ignoratur. Huic Prouinciæ adhæret ea quam Transmontanam appellant, Regio optimi tritici, generosique vini ferax, in qua est Brigantia, caput amplissimi Ducatus. Hæc ex Vaseo.

Sub Portugallia hoc tempore Algarbiæ regnum (quæ eius pars maritima est versus Meridiem) pertinet. Eius enim Rex, se Regem Portugalliæ, Algarbiæ, Guineæ, Æthiopiæ, Arabiæ, Persiæ & Indiæ scribit. Hoc Regnum primum circa Annum M. C. initium habuit. Ad ea enim vsque tempora sub Hispaniæ nomine (vti & antiquitus) censebatur. Sic autem de eo Marineus scribit; Henricus quidam Lotharingie Comes, vir in bello fortissimus à Gallia veniens, magnas aduersus Mauros res gessit. Pro quibus Alphonfus v. Castellæ rex permotus, filiam suam notham nomine Tiresiam ei matrimonio collocauit. Et Galleciæ partem, quæ in Regno Portugalliæ continetur nomine dotis assignauit. Ex eo postea matrimonio natus est Alphonfus, qui primus Portugalliæ Rex est appellatus. Primus qui Vlixbonam à Mauris recepit. Quorum quinque simul regibus vno prælio superatis, quinque scutorum insigne facti monumentum posteris reliquit. Oliuerius à Marcha in Annalibus, lingua gallica æditis, paulò accuratius huius Regni arma dipingit. Ait enim primo fuisse clipeum argenteum sine aliqua imagine, postea à deuictis quinque regibus, quinque caruleos clipeos impositos, deinde his singulis clipeis quinque argenteos orbiculos additos, in memoriam quinque vulnerum Domini nostri IESV CHRISTI, quæ illi inter præliandum diuinitus in celo apparuere; aut vt alij tradunt, quòd quinque vulneribus mortiferis fauciatus, Deo Opt. Max. opitulante, non occubuerat.

Vide etiam Hieronymum Osorium; Marineum Siculum; & Seb. Munsterum. De huius Regni origine, lege primum caput Decadum Asiaticarum Iohannis Barri. Athenæus libro. 8. cap. 1. quædam memorat de fertilitate huius regionis & aëris optima temperie. Huius Regni Urbem primariam Vllissiponam descripsit Damianus à Goes peculiari libello.

Lusitanorum Imperium hodie quàm latissimè patet; nam ab Herculis columnis vsque ad Chinam & Lequios per omnes Prouincias maritimas Insulasque adiacentes, extenditur.

